

Marzi Strassolt: il ricuart di un arlêf, e po coleghe

FRANCESCO MARANGON

Il gno ultin contat – magari cussì no, dome “indiret” – cul professôr Marzi Strassolt al è leât a un episodi, piçul ma significatîf, de nestre maniere di incrosâ lis competencis. Propit te matine dai 5 di Zenâr dal 2017 o varès vût di partecipâ cun lui ae regjistrazion de trasmission de radio RAI Friûl-Vignesie Julie dal titul “Vuê o fevelin di...” (un program di atualitât, costum, culture e societât, in onde ogni dì dal lunis al vinars, aes 11.07 a buinore e dopo misdi aes 15.15, par dîs minûts), che e veve di sedi trasmetude pôcs dîs dopo par fevelâ propit di “Economie des minorancis lenghistichis. La tutele de diversitât come valôr”, la ultime impuartante fadie editoriâl dal professôr Strassolt publicade tal mê di Mai dal 2016 de cjase editore Carocci.

Il libri al vûl contribuî ae cognossince dai rapuarts jenfri lis condizions lenghistichis di une region tant che il Friûl-Vignesie Julie, uniche in Europe, dulà che si puedin cjatâ cuatri grandis culturis: latine, gjermaniche, slave e celtiche.

E simpri a chest libri e je leade la mê ultime esperience personâl cul prof. Strassolt, stant che – cun mê maravee – al ve la idee di proponimi di partecipâ ae prime presentazion publiche dal saç, ai 17 di Otubar dal 2016, tal Salon dal Consei provinciâl di Palaç Belgrât.

Une maniere di frontâ plui dissiplinis, incrosantlis tra di lôr, che lui mi veve za usât a fâ.

Di fat, o ai cognossût il professôr Marzi Strassolt plui di trente agns indaûr, cuant che o studiavi Economie a Triest, dulà che lui al insegnave. La prime esperience di lavôr cun lui e fo za in chês volte, cuant che mi tirà

dentri, a pene laureât, intune des sôs ricercjîs impuartantis su la economie locâl¹. Po mi contà, une volte jentrâts in confidence, di vêmi individuât ancje in grazie di chê furlanetât (austroongiàrese, o zonti jo) che nus leave e che e je stade, tai agns, l'element fondamentâl de nestre colaborazion.

Un coleghe speciâl che al fasè une vore, cu la sô determinazion, pe mê cressite professionâl te Universitât dal Friûl. Al pont che mi segnalà diretamentri la oportunitât di tornâ in Friûl dopo vê stât par un periodi te universitât des Marchis. E il gno al è dome un dai esemplis di cheste fate. Ancje come Retôr mi cjapà dentri in variis responsabilitâts gjezionâls (dal an academic 1994/1995 al 2000/2001, delegât di setôr pe sede decentrade di Gurize; tai agns academic 1999/2000 e 2000/2001 delegât aes risorsis finanziariis), mostrandmi une fiducie che al inizi mi fasè maravee, ma che cul timp mi sburtà simpri a superâ lis dificultâts dal nestri mistîr.

Speciâl al fo ancje l'incuintri di esperiencis che o vin vût come aministradôrs locâls, lui President de Provincie di Udin, jo Assessôr ae Culture in chê di Gurize. Su chei che si disaressin “fronts politics diferents” o vin cjatât cetancj spazis di cooperazion, in graciis di chê afinitât culturâl che tu ti cjatis a scuvierzi cu lis vicendis personâls plui diferentis.

Tantis ancje lis ocasions di stâ insiem par lavorâ su obietîfs comuns, come chel de Societât Sientifiche e Tecnologjiche Furlane (SSTeF), prime cu la fondazion e po cu lis sôs cunvignis e lis sôs rivistis. Ma ancje cuant che, par esigjencis academichis, o diventai President (magari cussì no, l'ultin) dal Consorzi Universitari dal Friûl e o rivarin tal 2012 a une ipotesî ambiziose, po no lade a bon fin, di insediament de SSTeF li de cussì clamade “Cjasute gotiche dal Tresinte” di Udin.

Cun chescj e tancj altris ricuarts Marzi al sarà simpri par me font di ispirazion par cirî di continuâ un lavôr grant e convint pal disvilup uman sostignibil dal nestri Friûl.

¹ Esperience che mi permetè cualchi an dopo di elaborâ il cjapitul *I redits figuratîfs e i autoconsums alimentârs: problemis di definizion, rilevazion e*

stime, tal volum par cure di Strassolt M. (1993). *Redit des fameis a nivel comunâl: metodis di stime e di analisi*. Udin: CREF.